

FONDACIJA CURE

VIJESTI

Četvrto izdanje
Oktobar – Decembar 2025.

Dragi/e prijatelji/ce, saradnici/e i podržavatelji/ce,

Kako se godina privodi kraju, osvrćemo se na period ispunjen intenzivnim radom, zajedničkim naporima i važnim iskoracima. Protekli mjeseci bili su obilježeni brojnim aktivnostima kroz koje smo, zajedno s vama, nastavile graditi prostor za feministički dijalog, solidarnost i društvenu odgovornost.

U posljednjem kvartalu 2025. godine posebno izdvajamo naše učešće u kampanji 16 dana aktivizma protiv rodno zasnovanog nasilja, tokom koje smo kroz različite inicijative i javne poruke još jednom podsjetile na važnost kontinuirane borbe za prava žena i rodnu ravnopravnost.

Hvala vam što ste i ove godine uz nas i što kontinuirano podržavate naš rad – vaša prisutnost i povjerenje daju smisao svemu što radimo.

Tim Fondacije CURE



Implementirane aktivnosti (oktobar – decembar 2025.)

Feministička perspektiva brige o sebi i zajednici koja te okružuje

Ovaj period obilježile su aktivnosti usmjerene na feminističku brigu o sebi i zajednici, shvaćenu kao politički čin i kolektivnu praksu. Kroz edukativne programe, susrete i radionice, povezivale smo ličnu dobrobit s procesima osnaživanja žena i djevojaka, te jačanjem zajednica zasnovanih na solidarnosti, međusobnoj podršci i otpornosti.

U saradnji s Udruženjem žena Zumbul iz Vogošće, **13. 10. 2025.** organizovale smo panel diskusiju „**Korak po korak do tvoje ekonomske slobode**“. Ovaj veoma inspirativan razgovor bio je namijenjen ženama i djevojkama koje žele napraviti svoj prvi ili naredni korak ka ekonomskoj nezavisnosti i osnaživanju, bez obzira na godine, obrazovanje ili prethodno radno iskustvo. Kroz konkretne savjete, razmjenu iskustava i podršku, učesnice su stekle znanja i vještine potrebne za aktivno učešće na tržištu rada.

15. 10. 2025. u saradnji sa Udruženjem **UOMO Grada Cazina**, održana je promocija publikacije „**Neustrašive heroine mira**“. Kroz lična svjedočanstva heroína, otvoren je prostor ženama s različitim životnim iskustvima koje su dale značajan doprinos svojim lokalnim zajednicama. Publikacija je osmišljena s ciljem motivisanja žena da nastave s aktivizmom, i da svoja znanja i iskustva prenose na mlađe generacije, **naglašavajući važnost solidarnosti među ženama.**

16. 10. 2025. održan je sastanak s predstavnicama Udruženja žena „**Vakat**“ iz Borsanske Krupe, fokusiran na razmjenu ideja i planiranje narednih koraka saradnje. Istog dana održan je i sastanak s predstavnicama Udruženja Romkinja **Romska djevojka** iz Prnjavora, s ciljem jačanja međusobne saradnje i zajedničkih inicijativa.

U Domu mladih Tinja Gornja, **28. 10. 2025.**, u saradnji s Aktivom žena Tinja održana je panel diskusija na temu „**Kako da damo doprinos u svojoj lokalnoj zajednici**“. Aktivnost je bila namijenjena ženama koje žele aktivno učestvovati u društvenim promjenama, polazeći od svoje lokalne zajednice. Kroz razmjenu iskustava i razgovor, **učesnice su ohrabrene da pokreću inicijative i jačaju vlastite kapacitete, kao i kapacitete svojih udruženja.**

29. 10. 2025., u okviru aktivnosti „**Ružičasti oktobar**“, pružena je podrška ženama u Srebreniku kroz potpisivanje peticije za obezbjeđivanje dodatnog ljekara specijaliste ginekologa, s obzirom na to da Grad Srebrenik ima samo jednog ginekologa u Domu zdravlja. Aktivnost je uključivala i **podršku oboljelim ženama u procesu registracije i ostvarivanja prava.**

19. 11. 2025., u saradnji s Udruženjem žena za ruralni razvoj „**ZVIJEZDA**“ iz Vareša, održana je promocija publikacije „**Feminističko putovanje kroz vrijeme u BiH**“, nastale u okviru projekta

„Feminističko putovanje kroz vrijeme – Otvaranje prostora za generacijski prenos iskustva – transgeneracijske feminističke vrijednosti i potreba za brigom o sebi“. Publikacija donosi životna svjedočanstva žena različitih generacija koje su dale značajan doprinos svojim zajednicama, s ciljem ohrabrivanja nastavka feminističkog aktivizma, prenosa znanja i jačanja praksi brige o sebi.

20. 11. 2025., u saradnji s Udruženjem za podršku, edukaciju i razvoj **TRANSFORMATOR** iz Stoca, održana je promocija publikacije **„Feminističko putovanje kroz vrijeme u BiH“**, uz razgovor o generacijskom prenosu iskustva, transgeneracijskim

feminističkim vrijednostima i potrebi za brigom o sebi. Ova aktivnost otvorila je prostor za životna svjedočanstva žena koje su dale važan doprinos svojim lokalnim zajednicama, te **dodatno ohrabрила nastavak aktivizma i međusobne podrške među ženama.**

U periodu od 3. do 4. 12. 2025. godine, u Bijeljini je održan sastanak Inicijative **Mir sa ženskim licem**, na kojem se razgovaralo o budućim aktivnostima, uključujući inicijative vezane za imenovanje ulica po ženama u gradovima Bosne i Hercegovine.



Bosanska Krupa, 16.10.2025.



Prnjavor, 16.10.2025.



Činija Gornja, 28.10.2025.



Srebrenik, 29.10.2025.



Vareš, 19.11.2025.



Stolac, 20.11.2025.

Jačanje otpornosti protiv antirodnih pokreta

U okviru kontinuiranih aktivnosti Fondacije CURE usmjerenih na jačanje otpornosti protiv antirodnih pokreta u Bosni i Hercegovini, tokom novembra organizovale smo trodnevnu radionicu „Zajedno rastemo i gradimo otpornije zajednice“, održanu od **20. do 23. novembra 2025.** godine u Sarajevu. Kroz zajednički rad razgovarale smo o strategijama otpora i solidarnosti unutar feminističkog i ženskog pokreta,

analizirale prijetnje koje donosi širenje antirodnih narativa, te kroz praktične vježbe učile o važnosti integrisane sigurnosti i brige kao temelja snažnih pojedinki i održivih pokreta. Poseban fokus bio je na razvoju sigurnosnih planova, kao i na kampanjama, rizicima i mehanizmima zaštite u online prostoru.



Sarajevo, 23.10.2025-20.

Zeleni i rodno odgovorni prioriteti pred Opće izbore 2026 – Nema nazad!

Fondacija CURE, **21. oktobra 2025.** u Sarajevu okupila je 20 učesnica i učesnika na konferenciji posvećenoj povezivanju rodno odgovornih i zelenih politika uoči Općih izbora 2026. Konferencija je održana u okviru projekta „**Nema nazad! 20 godina smo tu! Vidljive, snažne, ujedinjene* ka zajedničkom cilju: stojimo na braniku ostvarenih ženskih prava!**“

Tokom konferencije otvoren je prostor za razgovor o ključnim temama koje oblikuju savremeni politički i društveni kontekst. Poseban fokus stavljen je na važnost vidljivosti političarki kao preduslova demokratskih procesa, potrebu za ravnopravnim pristupom finansijama, medijima i političkim listama, kao i na odgovornost medija za rodno osjetljivo izvještavanje.



Sarajevo, 21.10.2025.

Škola digitalnog i kreativnog aktivizma „Linkuj promjenu”

U partnerstvu s Fondacijom Jelena Šantić iz Beograda, Fondacija CURE je organizovala Školu digitalnog i kreativnog aktivizma „Linkuj promjenu“, **od 4. do 7. decembra 2025.** godine na Zlatiboru u sklopu projekta Aktivističko naslijeđe – digitalni glasovi mladih za pravdu i sjećanje u Srbiji i BiH. Četverodnevni program okupio je mlade aktiviste i aktivistkinje iz organizacija civilnog društva iz Bosne i Hercegovine i Srbije s ciljem povezivanja kreativnosti,

digitalnog aktivizma i odgovornog odnosa prema prošlosti i savremenim društvenim izazovima.

Tokom škole učesnici i učesnice su razvijali vještine digitalnog zagovaranja, storytellinga i vizuelne komunikacije, istraživali naslijeđe sukoba 1990-ih i kolektivno sjećanje, te učili o ulozi umjetnosti, digitalne sigurnosti i borbe protiv dezinformacija u izgradnji kulture mira i solidarnosti.

Radionica 8. decembra: Dan sjećanja na žene stradale u ratu

U saradnji s Udruženjem Sahan iz Vogošće, Selma Hadžihalilović je u ime tima Fondacije CURE održala interaktivnu radionicu u toku **16 dana aktivizma protiv rodno uvjetovanog nasilja**. Kroz vođenu diskusiju učesnice su razgovarale o predrasudama i stereotipima prema ulozi žena u društvu, posebno u kontekstu nasilja nad ženama. Tokom radionice, učesnice su izradile informativni pano o prevenciji nasilja nad ženama na kojem su pisale i direktne podržavajuće poruke ženama koje u ovom momentu trpe nasilje. Ovaj pano sada krasi prostorije Općine Vogošća.

Istoga dana, **8. 12. 2025.** godine, učesnicama je predstavljena i **inicijativa o imenovanju ulica u malim lokalnim zajednicama po zaslužnim ženama**. Kako Vogošća nema nijednu ulicu koja nosi ime po ženi iz lokalne zajednice, učesnice su se usaglasile da inicijativa o imenovanju jedne takve ulice mora biti što prije upućena Vijeću. S obzirom na to da je radionica organizovana 8. decembra, vrijednim učesnicama je predstavljena **inicijativa za usvajanje 8. decembra kao dana sjećanja na žene stradale u ratu**. Tokom ovog susreta, učesnice su dobile i materijal zajedničke kampanje ženskih organizacija sa područja cijele Bosne i Hercegovine.



Vogošća, 8.12.2025.



Vogošća, 8.12.2025.

ANGAŽMAN FONDACIJE CURE KROZ JAVNE DOGAĐAJE I SARADNJE

U periodu od 10. do 12. 10. 2025.

predstavnice Fondacije CURE aktivno su sudjelovale na sastanku Mreže Žena u crnom u Radmilovcima u Srbiji, dajući poseban doprinos na sesijama „**Od Dejtonskog mirovnog sporazuma: Bosna i Hercegovina u raljama Srbije, Hrvatske, međunarodne zajednice**” i „**Mirovni sporazum odozgo – feministička kritika Dejtonskog sporazuma**”. Kroz ove diskusije jasno je potvrđeno da bez snažnog i kontinuiranog doprinosa ženskih organizacija nema ni održivog mira niti pune pravde za žene. Aktivno smo sudjelovale i na Okruglom stolu na temu „**Starije osobe kao snaga**

inkluzivnog razvoja“ održanom 20.

10. 2025 u prostorijama Europe House u Sarajevu, u organizaciji Inicijativne grupe starijih građana i građanki. Cilj Okruglog stola bio je da kroz strukturisani dijalog okupi starije i mlađe aktiviste/kinje, predstavnike/ce institucija i organizacija koje se bave pitanjima starijih osoba, organizacija civilnog društva, donosiocice/teljke odluka i medije, kao i zagovornike/ce inkluzivnih politika, kako bi zajednički sagledali stanje u društvu kada je riječ o ulozi, potencijalima i izazovima s kojima se starije osobe suočavaju.

Zaustavimo femicid

Predstavnice Fondacije CURE učestvovala su **3. i 4. 11. 2025.** godine na dvodnevnom specijaliziranom treningu u Sarajevu o sprječavanju femicida i rodno zasnovanog nasilja u BiH, namijenjenom policijskim službenicima/ama, predstavnicima/ama centara za socijalni rad, institucijama ombudsmena za ljudska prava BiH, MUP-ovima, skupštinama

gradova i nevladinim organizacijama. Upravo kroz ovakav multisektoralni pristup i kontinuirani dijalog moguće je unaprijediti odgovore na rodno zasnovano nasilje i graditi odgovornije prakse zaštite žena.

Susret novinarki i aktivistkinja iz Bosne i Hercegovine i Srbije

17. 12. 2025. učestvovala smo na susretu s grupom „**Novinarke protiv nasilja**” i **neformalnom novinarsko-aktivističkom platformom iz BiH** kako bi razgovarale o praksama izvještavanja o nasilju nad ženama, razmijenile iskustva i podržale jedna drugu. Kroz ove susrete gradimo zajedničko razumijevanje i podižemo kvalitet medijskog izvještavanja, jer

profesionalno i osjetljivo izvještavanje ima moć da doprinese prevenciji i smanjenju nasilja.

Nema nazad! Sretne smo što smo članice ove grupe i što imamo priliku za sjajnu saradnju sa novinarkama-aktivistkinjama.



Sarajevo, 17.12.2025.



Radmilovci, 10-12.10.2025.


Feministički forum otpora i solidarnosti

U Tuzli smo od **24. do 26. 10. 2025.** godine učestvovali na Regionalnom forumu mirovnjakinja, feministkinja i aktivistkinja „Feministički forum otpora i solidarnosti” koji je okupio aktivistkinje iz cijelog regiona, a i mi smo imale svoje mjesto među našim saborkinjama. Polaganjem cvijeća na Kapiji u Tuzli i odavanjem počasti žrtvama masakra, započele smo program simbolično podsjećajući na važnost kulture sjećanja

i borbe protiv zaborava. Forum je prvi put organizovalo Udruženje „Ženska vizija” u Tuzli kako bismo zajednički izgradile prostor regionalne saradnje i feminističkog djelovanja. Okupljajući žene iz BiH i regiona, nastojale smo kroz dijalog, razmjenu iskustava i zajedničke strategije jačati ženski glas u borbi za pravdu, mir i rodnu ravnopravnost.



Tuzla, 24.10.2025.



Tuzla, 24.10.2025.

Lezbejska sedmica E*LC

U periodu od **4. do 7. 12. 2025.** godine u Beogradu je obilježena Lezbejska sedmica. Kroz četverodnevni program panela, diskusija, filmskih projekcija, šetnji, muzike, žurki i zajedničkih trenutaka, članica tima Fondacije CURE Selma Hadžihalilović prisustvovala je jubilarnom slavlju 30 godina djelovanja Labrisa. U okviru E*LC programa, Selma je govorila na panelu „Razgovor o nevidljivim oblicima nasilja među ženama

u istospolnim partnerskim odnosima“ i tako podijelila svoja znanja i iskustva sa velikim brojem učesnica.



Beograd, 7.12.2025-4.



Festival queer i feminističke kulture Smoqua

Predstavnice Fondacije CURE Stela Vuković i Denija Hidić su u periodu od **9. do 11. oktobra 2025.** boravile u Rijeci gdje su učestvovala na fantastičnom **Festivalu queer i feminističke kulture Smoqua**, koji već devet godina pokazuje da se **kultura i aktivizam** mogu ispreplesti s održivošću, brigom o zajednici i zabavom.

Kroz bogat festivalski program ispunjen radionicama, razgovorima i umjetničkim sadržajima, zajedno s našim sestrama proslavile smo 25 godina postojanja Lezbejske organizacije LORI u Rijeci!

Fondacija CURE na Kongresu mladih Evropljana i Evropljanki u Tirani

„Congress of Young Europeans” ove godine je od **9. do 12. 10.** u Tirani okupio više od stotinu mladih ljudi iz različitih dijelova svijeta, otvarajući temu „krajeva Evrope” kroz promišljanje o političkim, kulturološkim i transformativnim faktorima koji oblikuju savremenu Evropu. Volonterka Fondacije CURE Ajša Kočan

predstavljala je našu organizaciju na ovom značajnom omladinskom događaju. Kongres je pružio jedinstvenu priliku za razmjenu iskustava, umrežavanje i promišljanje o budućnosti Evrope iz perspektive mladih, kao i uvid u historiju Albanije i grada Tirane.



Rijeka, 9.-10.11.2025.



Tirana, 10.10.2025.

MEGAPHONE SARAJEVO 2025.

Na međunarodnom događaju MEGAPHONE 2025, koji se ove godine održao u Sarajevu **19. i 20. novembra**, članica tima Fondacije CURE Lejla Pleh učestvovala je u razgovorima o tome kako aktivizam učiniti relevantnijim kroz pažljivo slušanje zajednica, korištenje tehnologije i usklađivanje rada s potrebama **građana i građanki**.

Deset godina ERA-e: Gradimo ono što slijedi – hrabre, ujedinjene i nezaustavljive!

Kao punopravna članica ERA – LGBTI Equal Rights Association for the Western Balkans and Türkiye, Fondaciju CURE je na regionalnoj konferenciji „**ERA u 10. godini: Gradimo ono što slijedi – hrabre, ujedinjene i nezaustavljive!**“, održanoj od 24. do 27. novembra u **Prištini**, Kosovo, predstavljala Selma Hadžihalilović.

Selma je učestvovala na panel diskusiji „**Korištenje moći – LGBTIQ+ pokret u procesu pristupanja Evropskoj uniji**

Događaj okuplja oko stotinu aktivista i aktivistkinja iz Srednje i Istočne Evrope, Centralne Azije i Kavkaza, pružajući prostor za razmjenu iskustava, umrežavanje i jačanje međusobne podrške.

i međunarodnim arenama“, gdje je podijelila iskustva i naučene lekcije sa 69. zasjedanja Komisije za status žena (New York, mart 2026), kao i iz različitih međunarodnih zagovaračkih procesa i strateških platformi djelovanja. Konferencija je predstavljala izuzetnu priliku za umrežavanje sa ključnim akterima/kama na regionalnom nivou, razmjenu iskustava te bolje razumijevanje izazova s kojima se suočavaju aktivisti/kinje za jednaka prava širom Zapadnog Balkana i Turske.



Sarajevo, 20.11.2025.



Priština, 24-27.12.2025.

Žene, mir i sigurnost

Članica tima Fondacije CURE Selma Hadžihalilović primila je **direktan poziv Direktorata za rodnu ravnopravnost i intersekcionalnu analizu (DGEIA) Ministarstva odbrane Kanade** da učestvuje kao jedna od glavnih govornica na Konferenciji „**Žene, mir i sigurnost**“ 2025 (#WPS25), koja je održana od 27. do 29. oktobra 2025. godine u Ottawi, Ontario, Kanada. Konferencija je obilježila 25. godišnjicu usvajanja historijske Rezolucije 1325 Vijeća sigurnosti Ujedinjenih nacija o ženama, miru i sigurnosti (WPS),

te je predstavljala priliku za osvrt na 25 godina implementacije i operacionalizacije agende „Žene, mir i sigurnost“. Kao posljednja govornica na konferenciji, Selma je govorila na temu „**Šta slijedi: Oporavak i otpornost**“, prenoseći poruke o važnosti uključivanja žena na svim nivoima i u svim fazama mirovnih pregovora, te dijeleći iskustva iz feminističkog i mirovnog aktivizma u Bosni i Hercegovini i regionu Zapadnog Balkana.



Ottawa, 27-29.10.2025.

Women „Žene i mir: Stopama Berthe von Suttner – Kakvo naslijeđe i koje perspektive?“

Denija Hidić, u ime Fondacije CURE, imala je priliku da Međunarodni dan ljudskih prava, 10. decembra 2025. provede u Palači mira u Hagu, učestvujući na konferenciji pod nazivom „**Žene i mir: Stopama Berthe von Suttner – Kakvo naslijeđe i koje perspektive?**“. Ovaj dvodnevni međunarodni događaj održan je **9. i 10. decembra 2025.** u Hagu, simbolično obilježavajući važnu ulogu žena u izgradnji mira, širenju pravde i transformaciji svjetskih mirovnih procesa. Fokus skupa bio je na promociji ženskog liderstva u rješavanju konflikata, uključivanju žena u mirovne pregovore i povećanju rodne ravnopravnosti u pitanjima sigurnosti i mira.

Konferencija je inspirisana naslijeđem Berthe von Suttner, prve žene dobitnice Nobelove nagrade za mir (1905), čije su ideje i poziv na razoružanje ostavile uticaj na mirovni pokret širom svijeta. Konferencija Women & Peace u Hagu bila je i platforma za stvaranje konkretnih mirovnih strategija, internacionalnih partnerstava i međunarodnih obaveza za održiv i inkluzivan mir. Izgradnja mira mora uključivati glasove i iskustva žena iz svih regiona i zajednica kako bi odgovorila na kompleksne izazove savremenog svijeta.

Zdravstveni karavan „Tvoj pregled, tvoja snaga”

Ponosne smo što su u Sarajevu **30. i 31. oktobra 2025.** u Parku Hastahana žene do 45 godina starosti imale priliku besplatno obaviti ultrazvučni pregled dojke bez zakazivanja i bez knjižice. Preglede je organizovalo **Udruženje „Heroine” iz Beograda**, uz podršku lokalnih partnerskih organizacija, **Fondacije CURE i Udruženja Renesansa**. Cilj karavana je podizanje svijesti o važnosti prevencije, jer, ako se karcinom dojke otkrije na vrijeme, izlječiv je. Ovakve inicijative omogućavaju ženama jednostavan pristup ranim skrining pregledima i brigu o zdravlju.

Uz to, Fondacija CURE je, u saradnji s Centrom za dojku dr. Una Delić, **facilitirala 50 besplatnih pregleda dojki za žene** u Sarajevu. Pregledi su realizovani u sklopu inicijative **Wings of Hope**, s ciljem jačanja dostupnosti preventivnih zdravstvenih usluga i rane detekcije karcinoma dojke.



AKTIVIZAM, KULTURA I UMJETNOST

Od 17. do 19. 10. 2025. sudjelovale smo na Festivalu ženskog aktivizma, stvaralaštva i poduzetništva FemFest Lukavac 2025. u organizaciji **Udruženja žena „Srce i duša”** Prokosovići-Lukavac i ujedno organizovale promociju publikacije „Feminističko putovanje kroz vrijeme – Otvaranje prostora za generacijski

prenos iskustva – transgeneracijske feminističke vrijednosti i potreba za brigom o sebi“. Važno nam je biti dio ovakvog festivala jer slavi žensko stvaralaštvo, potiče kreativnost i okuplja zajednicu koja kroz inkluzivni aktivizam oblikuje podržavajuću kulturnu scenu.



Lukavac, 17-19.10.2025.



Lukavac, 17-19.10.2025.

Fondacija CURE je **27. 10. 2025.** godine imala priliku ugostiti učesnike **MENA Fellowship programa**, koji se realizuje u okviru organizacije „Zašto ne“. Ovaj program okuplja aktiviste i predstavnike organizacija civilnog društva iz zemalja Bliskog istoka i Sjeverne Afrike, s ciljem jačanja njihovih kapaciteta i korištenja tehnologije za praćenje političkih procesa, borbu protiv dezinformacija, unapređenje odgovornosti medija i izgradnju

demokratskih vrijednosti u regionu. Na susretu smo razgovarale o stanju ljudskih prava u Bosni i Hercegovini, položaju žena, diskriminaciji, kao i o izazovima i napretku LGBT+ zajednice. Predstavile smo rad naše Fondacije, naše projekte i saradnje, te razmijenile iskustva i ideje sa gostima iz MENA regiona.



Sarajevo, 27.10.2025.



Sarajevo, 18.12.2025

7. 11. 2025. prisustovale smo drugom po redu **SKRIPTA Clothes Swap** – druženju uz razmjenu odjeće! Na ovaj način nastojale smo doprinijeti održivosti kroz razmjenu naše stare garderobe uz zajedničko druženje. Događaj je imao i humanitarni karakter jer je dio garderobe doniran Sigurnim kućama u Sarajevu i Zenici.

U Sarajevu smo **18. 12. 2025.** prisustovale promociji umjetničkog performansa kojim je otvorena kampanja „**Dok nas smrt ne rastavi**“, usmjerena na sprečavanje femicida kao jednog od najurgentnijih društvenih problema, ne samo u Bosni i Hercegovini već i u cijelom regionu. Ovu kampanju je pokrenula Fondacija Udružene žene Banjaluka.



Dan državnosti Bosne i Hercegovine, **25. 11. 2025.** obilježile smo u Ilijašu gdje smo prisustovale obilježavanju izložbi žena pripadnica Armije BiH pod naslovom „**Od borkinje do kreativke**“. Inspirativna izložba nastala je u organizaciji Udruženja pripadnica Armije BiH Općine Ilijaš.

Prisustovale smo otvorenju izložbe „**Ženski otisci: arhivska građa kao svjedok vremena**“ u prostorijama Arhiva Bosne i Hercegovine čime je obilježeno 78 godina od osnivanja te institucije. Ova značajna izložba, svečano otvorena **12. decembra**, predstavlja rezultat višemjesečnog istraživanja **arhivske građe koja svjedoči o ulozu i doprinosu žena u političkom, kulturnom, obrazovnom i društvenom životu Bosne i Hercegovine tokom 19. i 20. stoljeća.** Kroz dosjee, fotografije,

službene spise, dopise, školske dokumente i lične zapise, izložba je otkrila manje poznatu, ali izuzetno važnu žensku historiju.

Posljednji mjesec u godini zaokružen je posjetom naših prijateljica iz **Udruženja žena Peščanik** i drugih udruženja okupljenih u Mreži žena Rašinskog okruga, koje su u velikom broju došle u naše prostorije u Sarajevu **22. 12. 2025.** godine. Udruženje Peščanik bavi se osnaživanjem žena i zagovaranjem rodne ravnopravnosti, te smo kroz interaktivan susret razgovarale o zajedničkim vrijednostima, upoznale se, razmijenile iskustva o radu naših organizacija, te podijelile svoja dugogodišnja iskustva u aktivizmu i izazove s kojima se susrećemo.

PROMOCIJA ZNANJA I KNJIŽEVNOSTI

26. 11. 2025. godine prisustvovala smo promociji diplomantica Visoke škole za menadžment i turizam Konjic, realizovanoj uz podršku Fondacije CURE pod nazivom „**Obrazovanje obespravljenih djevojaka i žena u BiH**“. Ovaj projekat omogućio je besplatno školovanje ženama iz marginalizovanih grupa i rezultirao njihovim uspješnim diplomiranjem. Tokom cijelog obrazovnog procesa, CURE su pratile studentice od njihovih prvih koraka pa sve do odbrane

diplomskih radova. Danas smo posebno sretne i ponosne što su diplomirale i postale konkurentne na tržištu rada, osnažene znanjem, samopouzdanjem i novim mogućnostima. Posebno nas raduje što smo partnerice **Visoke škole za menadžment i turizam Konjic**, koja zajedno s dekanesom prof. dr. Marijanom Semic Šećibović, kontinuirano ostvaruje značajne rezultate i doprinosi unaprijeđenju obrazovnih prilika za žene.



Konjic, 26.11.2025.

16 dana aktivizma

Jedna od najvažnijih aktivnosti ove godine bila je kampanja za 16 dana aktivizma pod nazivom „**Primijeni zakon. Zaštiti svaku djevojčicu, djevojk, ženu!**“ u virtualnom i realnom prostoru. Na bilbordima u Mostaru, Tuzli, Sarajevu, Višegradu, Banjaluci, Zenici, Travniku, Kiseljaku i Istočnom Sarajevu skrenule smo pažnju na nasilje nad djevojčicama i slučajeve femicida u Bosni i Hercegovini. Na ovaj način pozvale smo institucije na svim nivoima vlasti da štite sve građanke naše države, a posebno najnezaštićenije među nama – djecu i mlade. Ujedinjene snagom solidarnosti i otpora, poručujemo

da je svako nasilje nad ženama prioritetno političko pitanje koje se tiče cijelog društva i koje zahtijeva najoštrije kaznene sankcije dozvoljene u Bosni i Hercegovini.

Kampanja za **16 dana aktivizma** je naš krik protiv svih struktura koje relativizuju nasilje i naš poziv institucijama da osiguraju da se svaka djevojčica, djevojka i žena osjeća bezbjedno i slobodno u svojoj zajednici.

**PRIMIJENI ZAKON.
ZAŠTITI SVAKU
DJEVOJČICU,
DJEVOJKU, ŽENU!**



Projekat finansiraju pod izdaju: Fondacija Kvinna ili Kvinna i UK International Development



Ulična akcija povodom 25. novembra

25. novembra, **na dan borbe protiv rodno zasnovanog nasilja**, izašle smo na ulice kako bismo zajedno podigle glas protiv svakog oblika nasilja nad ženama i djevojčicama. Tokom akcije dijelile smo marame s porukom „**Niti jedna više!**“, simboličnim podsjetnikom na hitnu potrebu da se zaustavi spirala nasilja koja pogađa naše zajednice.

Građani i građanke su s nama dijelili svoja iskustva, stavove i podršku, a razgovori koje smo vodile još jednom su potvrdili koliko je važno kontinuirano ulagati u osvještavanje, edukaciju i solidarnost. Naša poruka je jasna: nasilje se tiče svih nas, a stvarna promjena započinje odgovornim, zajedničkim i odlučnim djelovanjem.



HVALA DONATORKAMA I DONATORIMA!

Fondacija Kvinna till Kvinna (KTK), UK International Development, Global Fund for Women (GFW), Fondacija TRAG / Fondacija OAK, Heart and Hand Fund, Sigrd Rausing Trust, Heinrich Böll Stiftung Sarajevo (HBS), Friedrich-Ebert-Stiftung u Bosni i Hercegovini (FES), Women's World Day of Prayer (WWDP) – German Committee, EuroCentralAsian Lesbian* Community (EL*C)

Dvadeset godina našeg postojanja potvrđuje da nijedan iskorak ne bi bio moguć bez vaše podrške, povjerenja i solidarnosti. Ova godina, kao i sve prethodne, još jednom pokazuje koliko su zajedništvo i međusobna briga ključni za feminističku borbu.

Hvala vam što ste uz nas, što dijelite naše vrijednosti i što zajedno gradimo prostor u kojem su ravnopravnost, pravda i sloboda više od ideala. Hvala što ste na ovom putu s nama i što nastavljamo dalje.

Tim Fondacije CURE: Jadranka, Stela, Denija, Selma, Enida, Lana, Sanda, Jasmina i Lejla.



**Uključi se u radionicu.
Dođi na marš.
Podijeli ovu priču.
Podrži rad Fondacije CURE.**

**Tvoje prisustvo, tvoja riječ, tvoja podrška
– znače promjenu.**

PRATITE NAS I PRIKLJUČITE NAM SE!

 +387 33 207 561

 info@fondacijacure.org

 fondacijacure.org

 [fondacijacure](https://www.facebook.com/fondacijacure)

 [@fondacijacure](https://www.instagram.com/fondacijacure)

 [@Fondacija_Cure](https://twitter.com/Fondacija_Cure)

 [Fondacija CURE](https://www.youtube.com/Fondacija_CURE)